



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Afghanistan-i tashiyim amshi shia
telangzüba agütsütsü: PM Shehbaz Sharif

Smriti Mandhana-i otsü
tasen ishika yanglu



VOL. XXIII ISSUE NO. 06 (ADOK 06) DIMAPUR TENTONÜ MONDAY) MONGPUTENI (OCTOBER) 13, 2025

₹ 5.00

NIPF-i kin 4 atemasüoki iabilemer

Dimapur, October 12, 2025 (TYO): Nagaland Police mapatem atema district-wise reservation nung Indigenous Garo, Kachari, Kuki aser Mikir (Karbi) nunger medendaktsüba atema tebilemtsü abener ta Nagaland Indigenous People's forum (NIPF) Advisor Khehoto Kiho Swu-i ashi.

Constitution, (Nagaland) Schedule Tribe order 1970 ajanga item kin pezü ya Nagaland state nung Schedule Tribes rongnung densema lir. Maneni, 1969, 1972, 1973 aser 1983 nung Govt. Order (Om) notifications nunga (1) any Naga Tribe (2) Kuki, (3) Garo, (4) Kachari aser

(5) Mikir nunger nem non-technical grade III grade aser IV posts atema 100% reservation aser tanüingba shilem nung 80% reservation indang shia lir ta NIPF Advisor-i sangdong ka nung ashi.

Ajisiüaka, September 30, 2025 nü advertisement agütsüba nung kin pezü maden aser iba ya minority tribes senzüka yutsüba lir. Anungji NIPF nung Advisor ka ama ni Nagaland sorkar dang advertisement meyipa reprangshitsü aser Nagaland nung Indigenous kin ajak nem temeten agütsütsü mepishir ta Khehoto Kiho Swu-isa ashi.

Northeast India nung tzünglu kanga arur

Guwahati, October 12, 2025 (Agencies): Northeast India nung tzünglu kanga arur aser state ajak teimtibaji Mizoram nung aruba lir ta India Meteorological Department (IMD)-i ashi.

Tesüiba ghonda 24 tsüngda Mizoram kübok Chawngte nung tzünglu 13 cm aru aser iba ya Northeast nung teimtiba lir ta Regional Meteorological Centre (RMC), Guwahati-i metetdaksü.

Maneni, Mizoram kübok Khawzawl nung 9 cm, Bagafa (9 cm), Kolasib (9 cm), Sunpura (6 cm), aser Dullavcherra nung 6 cm tzünglu aru.

Meghalaya, Nagaland, Mizoram, aser Tripura kübok tesem teimba ka nung tzünglu terara aruogo aser Assam o Manipur nung tesem prokshia aru.

Arunachal Pradesh nungbo tesem kar nung dang tzünglu terara aru, ta RMC, Guwahati-isa metetdaksü.

Northeast nung anüngdang temperatures akhi ama dang liasü saka Nagaland o Tripura nungbo temekongba liasü.

IMD-isa taruba ghonda 24 tsüngda Mizoram kübok tesem aika nung tzünglu terara arutsü aser Nagaland o Tripura kübok tesem kar nung tzünglu terara arutsü ta metetdaksüogo.

Iba mapang Arunachal Pradesh, Assam, Meghalaya, aser Manipur nungbo tzünglu marutsü.

Taruba anogotem Assam, Nagaland, Manipur, Mizoram, aser Tripura nung tzünglu arutsü aser maximum temperatures nung temelenshi balaka malitsü ta IMD-isa metetdaksü.

Afghanistan-i Pakistan sepai 58 khaset

New Delhi, October 12, 2025 (Agencies): Honibar aonung tesü par sepaitemi Pakistani sepai 58 khasetogo ta Afghanistan nung Taliban sorkari metetdaksü.

Pakistan-i tayimtsü amshia Kabul densema Afghan provinces aika amakba sülen Afghanistan sepaitemi iba mapa inyak ta Helmand provincial administration atema spokesperson Mawlawi Mohammad Qasim Riaz-i ashi.

Pakistan-i Afghanistan anema inyakba sülen onoki "retaliatory operations" inyak. Iba ya yasüng ayaterm meta tembang ta Riaz-i ashi.

Afghan forces-i Pakistani army outposts 25 makdokogo aser idangji sepai 58 khaset aser 30 yirutsü ta Taliban spokesman Zabihullah Mujahid-ia ashi.

2,640-kilometer Durand Line kübok tesem balala nung linük ana nungi sepaitem khatap aser 2021 küm Taliban-i sorkar ketdangsütsü tenzüka sülen Pakistan aser Afghanistan tsüngda tesentaktep tamajungba kümogo.

"Onoki yasüng nükjidong tongogo aser ozü medemertem

Qatar o Saudi Arabia linüktemi iba rara anentsüla ta ashi. Anungji onoki tang atema rara anena lir" ta Afghanistan nung Acting Foreign Minister Amir Khan Muttaqi-i ashi. Pa ya tang India semdangi arua lir.

"Pakistan-i ozü lushi telungi aitra ozü armed forces-i linük kümzüka ayutsü renema lir" ta Taliban Defence Ministry spokesman Enayat Khwarazm-ia metetdaksüogo.

Afghanistan tsütsü nungi injang khaloktsüba ajanga onoki Afghan forces aser telungpurtem makogo ta Pakistan military-i metetdaksü.

Pakistani military ajanga sayuba video tem nung Jandusar checkpoint dena Afghan posts aika raksatsüba lir.

Parnokisa Taliban meyong Manjuba aser Darani Camp battalion headquarters amakba shiogo.

Afghanistan kübok Kabul nung bomb ana aser Paktika province nung ka apokba sülen anogo ana lir linük ana sepaitem tsüngda khatapogo.

MP Supongmeren-i highway projects mapa nung temulung masüba metetdaksür



Nagaland MP S Supongmeren Jamir-i NHIDCL ketdangsürtem den senden amendang tangokba noksa nung angur.

Dimapur, October 12, 2025 (Agencies): Nagaland MP S Supongmeren Jamir-i National Highways and Infrastructure Development Corporation Limited (NHIDCL) ketdangsürtem den senden ka amendang highway mapatong tongtitem yangluba nung mapang atsülangba aser mapang shia timtem ajuruba tebilemtsütem lemsatepogo.

Kohima nung NHIDCL Regional Office nung senden amendang NHIDCL Executive Director (Projects) R. P. Singh, Deputy General Manager (Projects) Anand Kumar, contractors aser consultants aden.

Dimapur-Kohima four-lane highway nung aser talisa New Chumoukedima Village anasa mapang shia lenmang shibangsüsa akümer. National

Highway 29 nung iban tongtipang shilem ya September 25, 2025 nung tembangsü ta Ministry of DoNER dangi osang yoka lir ta MP Supongmeren-i ashi.

Paisa Dimapur-Kohima four-lane highway, Kohima bypass, aser Kohima-Jessami road mapatongtem indang osang tejangjattem metetpela.

NHIDCL Executive Director R P Singh-i PowerPoint ka ajanga status report agütsüdang alima lendong balala aser tzüngluruwa ajanga mapa inyakba nung timtem agütsür ta ashi.

Dimapur bypass aser Dimapur-Kohima highway nung Package 2 renemogo aser Package 3 ji December 2025 tashi nung renemtsü imlar. New Chumoukedima nung Package 1 kübok anentsüh aludak protective measures inyaksü

tesemtem jangjaogo aser iba atema temelaba atar ta R P Singh-isa ashi.

Kohima bypass nung Packages 1, 2, and aser 4 nung mapa meilungi inyaker. Iba ya technical issues, tunnel distress, aser local challenges ajanga lir saka mapa inyakdar. Kohima-Jessami project atema tayongzükbatem koktetogo aser September 2026 tashi nung tembangsü ta Singh-isa metetdaksü.

MP Supongmeren-i sendaktepa alirtem tsüngda amalitepa inyaksü aser mapang memenutsü atema state sorkar den tongteprateptsü indang nenshi.

November 2025 nunga coordination meeting ka amentsü aser idangji Nagaland nung NHIDCL road projects ajak meyipa reprangshitsü ta paisa metetdaksü.

Assamese Hindu nunger 40% dang lir: CM Sarma

Guwahati, October 12, 2025 (Agencies): State nütsüng yongsük nung Assamese Hindu nunger 40% shi ka dang lir aser iba ya Muslim nunger nütsüng den tepila kecha balaka mali ta Assam Chief Minister Himanta Biswa Sarma-i tanü ashi.

Iba ya süoki ia bilemtsüba onük ka lir aser Centre sorkari Demography Mission inyaksü ashiba kübok mapa inyaksü nüngdaker ta CM Sarma-i metetdaksü.

"Kümtem süia arudang Assam nung nütsüng yongsük melenshiogo. 2021 küm Muslim nunger nütsüng yongsük 38% aden aser tanü parnok 39.5% lir" ta paisa ashi.

2011 Census data nung ajemdaker Assamese Hindu nunger nütsüng yongsük kanga ajema kümogo. Tanü Assamese Hindu nunger 40% dang lir ta Sarma-isa shisem.

Vaishnavite sobaliba tiyongtsü aser alima nung ayong nung asetkong tulutiba Majuli nung Muslim nunger 100% teimba kümogo. Iba ya odang masü saka tangalen nungi aruba ajanga lir ta paisa metetdaksü.

Assam nung Khristan nütsüng yongsük 6-7% shi ka lir. Prime Minister Narendra Modi-i Independence Day onük jembidang Demography Mission indang jembiba ya kanga nüngdak lir ta CM Sarma-isa

ashi.

"Centre sorkari iba mission kübok high-power committee ka tentettsü aser parnoki ozüing alema arurtem bushitsü, agentsü aser meyipa yoktsü. India sorkari tang mezüing atema iba khuret atema o tejangja jembio" ta paisa ashi.

Assam nung taruba census nung 'Miya-Muslim' nunger teimba asütsü. Assam nütsüng yongsük nung parnok 38% tema alitsü ta CM Sarma-isa ashi.

'Miya' ta asüba ya khenbo Bengali nunger Muslim tem dang "Bangladeshi immigrants" ta ajadang amshi saka tanüba Miya nungeri parnok maitsü ka ama benshir.

Arunachal ajanga Viksit Bharat tanüla sayur: PM Modi

Guwahati, October 12, 2025 (Agencies): India renlokba nung tang mezüing atema northeast ajiteter ta Prime Minister Narendra Modi-i ashi.

Arunachal Pradesh nung airports tasen yangluba aser self-

help groups tashi itdaksüba, connectivity nungi creativity ajanga Viksit Bharat tanüla sayur ta PM Modi-i ashi.

Arunachal Pradesh-i linük renlokba nung tongti shilem agir ta Union Minister Jyotiraditya

Scindia-i ocet ka züluba PM Modi-i lemsatop.

Tang mezüing atema Northeast ya tezülen aliba tesem ka masü saka India renlokba nung temulungjang lir ta PM Modi-isa metetdaksü.

TOAHDCC-i teintet rogotem 3rd Festival of Praise Concert ayongzük



Dimapur, Mongputeni/Oct. 12 (TYO): Tribal Old Age Home cum Day Care Centre (TOAHDCC) ajanga October 12, 2025 nü International Day of Older Persons nüngtem nung Senior Citizens' 3rd Festival of Praise Concert sentong Lorin Hall, Tetso College, Sovima nung "Revitalize" omen kübok agia liasü.

Tongti o jembir Theja Meru, Chairman, TaFMA, Government of Nagaland ajanga teintet rogotem dang yimya ka ama yariba kisung masü saka anogoshia anepalua amshia aser maparen balala nung parnok amshia parnok yaritsü aser tushitsü tongtipang ta ashi.

Pai anogo shia teintet rogotem yaritsü aser aser akumtsüboa tenüngsang agütsüba den ajaki teka amteper anepalutsü ayongzüka liasü.

Tepela temaitsü Meru nem Ivukhu Chisho-i yangluba 'indigenous musical instrument'

ka den ajok ka agüja liasü.

TOAHDCC Director, Imlitongzuk Amri-i pela agizükba o jembidang Nagaland nung mezüngbuba Senior Citizens' Music Club tenzüksü aser teintet rogotemasoshi "Jamming Corner" ka yanglutsü TOAHDCC mangdang lemsatop aser Tribal Old Age Home Cum Day Care Center indang documentary ka sayua liasü.

Paisa tang iba 'home' nungya tesem balala nungi teintet rogotem alir aser yangji alirtem rongnung arishi küm 98 tain tetsür ka tantsü sür lir ta ashi.

Kentenba sentong tenzuka arishi küm 67 tain Rev. Dirang Lungalang-i "Shoulders" (For King & Country) ken aten, iba sülen "Canon D" aten. Arishi küm 71 tain Tiala-i "Come Spring" ken ajanga shilem agi aser Rev. Hojevi Kappo-i "Just a Closer Walk with Thee" ken ajanga shilem agia liasü.

Ivukhu Chisho-i pai

yanglutetba indigenous instrument amshia "Hark the Herald Angels Sing" ken aten aser Pastor Tony Johnson-ia ken ka tena liasü. Arishi küm 69 tain Dr. Watimongla-i "Sweetest Gift" ken aten aser Dr. Nicky Kire-i Elvis Presley indang "Help Me" aser "Don't Forget to Remember Me" ken tena liasü. Arishi küm 62 tain Dr. Viketoulie Pienyii-i "Honesty" ken aten aser Old Timers temi "I'll Meet You in the Morning" aser "I'm Going to Hold On to Jesus" tena liasü.

Sentong lenir Kilentola Jamir liasü aser sentong tenzuka Rev. Mane Phom, Pastor, Signal Phom Baptist Church ajanga sarasadem.

Maneni TOAHDCC Family nungi generation asem lungjemer "When We All Get to Heaven" ken atena aser Pastor Wabang Longchari, Lead Pastor, The Lighthouse Church ajanga sentong nung adenertem moaja sarasademtsü.

Longleng nung World Mental Health Day amung

Dimapur, Mongputeni/Oct. 12 (TYO): District Mental Health Programme ajanga District Legal Services Authority den lungjemer "Access to Services - Mental Health in Catastrophes and Emergencies" omen kübok VCC & VDB Hall, Longleng nung World Mental Health Day munga liasü.

Shisalen sayur Dr. Lipok Phom, Nodal Officer DMHP, District Hospital, Longleng ajanga omen nung ajemdaker jembidang, tüzümsüng, menoknok aser nisungi yangluba timtem balala ajanga tekolok nung kongshir ta ashi.

Iba ama timtem mapang nüburtem nem mental health teyari agütsütsü kanga tongtipang lir, aser yangji mapang shidak nung anepaluba aser mental health professionals nüngdaker ta ashi.

Mental health teyari nungya counseling, psychiatric care, legal aid amala dena lir ta pai ashi.

P Monyei Phom, Deputy Legal Aid Defense Counsel ajanga tekolok meshidaker temeden indang rateta ashi aser mental health services aser LDLSA ajanga teyari agitsü ayongzüka liasü.

Sentong nung M Lithei Phom, DSRC Counsellor, District Hospital, Longleng menden liasü, K Niamla, Associate Pastor (Women), LTBC ajanga Tsüngrem temoatsü meshia sarasadem aser L Ongdok Phom, Psychiatric Social Worker, DMHP DH ajanga iba anogomung ratet shia liasü.

Sentong tembanga Panglang Y Phom, Retainer Lawyer, LDLSA ajanga melepzüng o jembi.

Waromungtsür Telongjem Kohima Hon Jubilee mungogo



Dr. Chubatala Aier

Dr. Chubatala Aier, Principal, C-Edge College, United Village, Chümoukedima ajanga Waromungtsür Telongjem-i tesüiba küm 50 tsüngta takok balala anguba benjonga aser tenüngsang agüja liasü.

Maparen balala ajungtsü asoshi tamendak dak tashi aittsü tongtipang lir, ajungji ajaki iba tamendak dak junga yanglutsüla aser tajungtiba asoshi maneni meranga inyaksüla, ta lai ashi.

Laisa nübur tenzükba nung aser terenlok asoshi bendanga agütsür maneni inyaksü ajungmesoa liasü.

Kohima Waromung Senso Telongjem aser Watsü Telen Kohima nungi benjong salem o jembia liasü, Jubilee nungu kakat ka saya aser Samaro teloki ken tajung ka agi telok ayongzüka liasü.

Waromungtsür Telongjem Kohima moaja aser tashi meshia Temjen Sampo, Pastor, Kohima Ao Baptist Arogo ajanga tarur pela agizükba o jembia liasü.

Longkumer-i sarasadema liasü.

Dimapur, Mongputeni/Oct. 12 (TYO): Waromungtsür Telongjem Kohima küm 50 ajungba Hon Jubilee mung Moluki, Kohima nung "Nükmen Tashi Itshi" omen nung ajemdaker October 11, 2025 nü munga liasü.

Sentong tenzuka Tsüktimeren Mollier, Pastor, Waromung Baptist Arogo ajanga sarasadem aser Waromungtsür Telongjem Kohima tir Temjenmongla ajanga tarur pela agizükba o jembia liasü.

Sentong nung tongti o jembir

BMSCH nung International Girl Child Day amung



BMS Multipurpose Hall, Kohima nung October 10, 2025 nü International Girl Child Day amungdang tangokba noksa ka yangi angur.

Dimapur, Mongputeni/Oct. 12 (TYO): Kohima District Administration, SINKALP District Hub for Empowerment of Women, Kohima aser Department of Social Welfare ajanga Bright Morning Star Children Home (BMSCH) den lungjemer October 10, 2025 nü BMS Multipurpose Hall nung International Girl Child Day munga liasü.

Iba sentong ya "The girl I am, the change I lead: Girls on the frontlines of crisis" omen nung ajemdaker amung.

Kesoneinuo, Gender Specialist, DHEW, Kohima ajanga iba sentong nung jembidang, tetsür chanu nem tashi agütsütsü aser 'gender

equality' ajungkettsü tongtipang ta ashi.

Alima tesem ajunga nung tetsür chanu temeden, shisaluyim aser takum junga alitsü asoshi awareness agütsütsü nükjildong nung International Girl Child Day ya United Nations-i tenzük, ta lai ashi.

"Education, healthcare aser maongka balala agitsü tetsür chanurtem temeden kasa lir. Tetsür chanu ajak mangdang lir asor, aser pei sasa pei dak tamang akatsü, meranga inyaksü aser tetsübo makai pei nükjildong arishitsü tongtipang lir. Temelenshi yagi dangar matar, asenoki adokdaksür," ta Kesoneinuo-i ashi.

Kesoneinuo-i Helen Keller takum otsü athishia jembidang, tanur asüandang nungi la tenük poka aser tenarong jakaka, Keller-i timtem jeni ajangeta graduate asü, kakat 14 zülü aser sentong balala 475 dak tema nung o jembiba ajanga la dak temulungtetba aser tejangraba aliba sayur, ta ashi.

O jembiri tetsür chanurtem dang pei aliba tesem nung animesor kati ka yaria aser temelenshi adokdaksütsü ayongzüka liasü.

Iba sentong tenzuka Asenla, PO, BMSCH ajanga sarasadem aser BMSCH nungi tanurtemi temeja ken ka aten. Iba sentong nung Pezet Newme menden liasü.

Dimapur nung district level awareness sentong ka agitsü

Dimapur, Mongputeni/Oct. 12 (TYO): Deputy Commissioner, Dimapur ajanga sangdong ka nung, October 13, 2025 anüngdang 11:30 ako nungi tenzuka Deputy Commissioner, Dimapur indang Conference Hall nung 'District-level Awareness-cum-Campaign on the Settlement of Unclaimed Deposits' sentong agitsü ta metetdaksü.

Deposits, dividends, interest warrants aser pensions tem densema 'unclaimed deposits' tem tajungba aser tekeraba nung bentettsü asoshi iba sentong ya linük tesem ajunga nung Reserve Bank of India

(RBI) aser State Bank of India (SBI) ajanga tenzükba nung shilem ka ama iba campaign ya ayongzük, ta sangdong ajanga ashi.

Iba sentong ya ajanga tetemsü customers, nominees aser senmangertem memonui item senotsü agiba nung yaritsü.

Iba awareness sentong nungya Dimapur district kübok Village Council Chairmen ajunga, Dimapur Urban Colony Chairman Federation nungi teshimtet nisungtem, Goan Bura Union Dimapur aser Goan Bura Association Dimapur nungi adentsü.



Bihar nung assembly election agitsü mapang ana nung lia October 12, 2025 nü Patna nung lanurtemi voters awareness bicycle rally nung shilem agidang tangokba noksa nung angur.

Bihar nung BJP-i menden 101 aser JDU-ia 101 nung tokteptsü

New Delhi, Mongputeni/ October 12 (Agencies): Bihar nung assembly election agitsü joko mapang ana nung lia NDA teloktep nungi BJP-i menden 101 aser Janata Dal (United)-ia menden 101 nung tokteptsü bangjemogo, ta Amongnü Union Minister Dharmendra Pradhan-i metetdaksü.

NDA teloktep nung dena aliba Union Minister Chirag Paswan'er party Lok Janshakti Party (Ram Vilas) nem menden 29 lempzüksü aser Rashtriya Lok Morcha (RLM) o Hindustani Awam Morcha (HAM) na nem menden trokrok (6) lempzüksüogo.

Bihar assembly election atema BJP in-charge, Pradhan leniba nung yaküm Haryana

election nunga BJP-i takok tulu ngua liasü.

Pradhan-i, Bihar nung NDA teloktep nung aliba party ajaki parnok nem lempzüksüba menden pelaa agizükogo, ta metetdaksü.

"NDA nung inyakertem aser lenirtem ajaki pelaa agizükogo. Bihar renema lir aser maneni yangi NDA sorkar tentettsü," ta pai X ajanga metetdaksü.

Union Minister aser taoba mapang Bihar Chief Minister Jitan Ram Manjhi-i aniba HAM aser RLM nati menden agi melung mesüi parnok kijai tokteptsü, ta amokmerena liasü.

Mezüngbo HAM-i parnok nem menden 15 lempzükjang ta takhangba agüja liasü.

Ajisüaka Amongnü Manjhi aser BJP lenirtem tsüngda jembishinüba sülen tangatettep ka dangi aruogo. Manjhi-i, par party nem tajemba agia menden 15 bosa lempzüksütsüla, mesüra parnoki parnok sasep nung tokteptsü, ta amokmerena liasü.

"Onok nem menden peria lempzüksütsüla. Iba ya takhangba agütsür masü saka temepishiba lir," ta pai metetdakja liasü. Ajisüaka Delhi nung BJP lenirtem ajurua menden alemba nungji ai-aura akaba sülen pa Patna-i meyipa ao.

Bihar nung Legislative Assembly election shilem ana lemsar November 6 aser November 11 anogotem nung agitsü, iba sülen November 14 nü vote azüngtsü.

Jihad rara ayongertem (Taliban) sorkari agizüker: Mehbooba Mufti

Srinagar, Mongputeni/ October 12 (Agencies): Amongnü PDP tongti lenir, Mehbooba Mufti-i Centre nung BJP-i aniba sorkar aija, sorkari Taliban-i yimsüsüba Afghanistan agizüker, ajisüaka India nung Muslim nungertembo anemabo inyaker, ta metetdaksü.

Tang India-i asentenshir Afghanistan linük den tesendaktep yanglushitsü atema inyaksangshiba aser tang Afghan Foreign Minister, Amir Khan Muttaqi-i India semdanga aliba mapang nung Mehbooba-i sorkar aitsür.

Taoba mapang Jammu & Kashmir nung Chief Minister,

Mehbooba-i X ajanga, "'Love Jihad,' 'Land Jihad,' 'Vote Jihad' aser 'Cow Jihad' tenüng nung BJP-i pei nübur Muslim nungertem anema inyaker. Iba denji külemi BJP yimsüsüba kübok democracy tetsüti India-i jihad rara ayonger Taliban agizüksü telemteba agiogo," ta metetdaksü.

Laisa, Afghanistan tanaben yangertsü atema India-i Afghan nung kaketshirtem nem scholarships agütsütsü lemtetba densema teyari balala agütsütsü lemtetogo, ta ashi.

"Afghanistan den tesendaktep yanglutsüji asalentong tsütsü tongtibang asütsüa akok, ajisüaka ibaji

meputeper, kechiyong linük nüchiso, maitsü aser terenlok atema shilem agir India nung Muslim nungertem bendanga züngshir," ta laisa metetdaksü.

"Muslim nung kaketshirtem nem agüja aliba scholarships BJP-i anentsüba aser Madrasas shibangtsüba ya ajanga telung nung anemsü sayur," ta lai ashi.

Mehbooba-i, "Tanga linüktem den tesendaktep yanglubaji tongtibang, ajisüaka linük ka tamendakdak tashi aitsü atema linük telung nung temelung lemteper, akhümtsübutep aser senso ajak kasa züngshitsü nüngdak," ta ashi.



Bengaluru, October 12, 2025: Rashtriya Swayamsevak Sangh (RSS) küm 100 ajungba nüngtem nung Bengaluru nung ayongzükba 'Path Sanchalan' sentong nung RSS züngsemtemi shilem agiba noksa nung angur.

WB nung medical student ka raksatsüba ken o nung nisung 3 apu

Durgapur, October 12 (Agencies): West Bengal kübok Durgapur nung Odisha nungi medical student ka tashiyim amshia raksatsüba ken o dak sendakba nung Bengal police-i nisung asem puogo, ta Amongnü Asansol-Durgapur Police Commissionerate-i metetdaksü.

Tawa Durgapur nung aliba medical college ka nung azünger second-year student ka tebur kari tashiyim amshia raksatsü. Laji Odisha kübok Jaleswar nungi lir.

Iba tatalokba ya aonung 8:00 nungi 9:00 ako tsüngda atalok," ta metetdaksü.

Honibarnü Deputy Magistrate aser SDO Durgapur, Ranjana Roy-i, tang la kanga junga lir aser la den tetsü lir, ta metetdaksü.

Iba tatalokba osang angazükba sülen Odisha Chief Minister Mohan Charan Majhi-i West Bengal Chief Minister Mamata Banerjee dang ozüing kübok ajak tansütsüsa aibelenertem nem temerenshi agüjang, ta takhangba agütsüogo.

Osang angazükba agi, tetsürlaji lar class pur ka den külemi langka achitsü atema kimai ayazüka liasü, iba mapang nungji tebur ana-asem aruba sülen la tashiyim amshia raksatsü.

Osangbenertem den jembidang tetsürla tebui, "Aonung 10:00 ako nung lar medemeru onok dang ner jala tashiyim amshia raksatsüogo, ta phone ajanga metetdakja liasü. Onok Jaleswar nung alir. Ozü jala yangi zünga liasü. Yashi lar class pur kati langka achitsü atema la anizüker ao saka tebur ana-asem aruba mapang nung pai la toktsür ajen. Parnoki la tashiyim amshia raksatsüogo.

Odisha CM-i, "West Bengal kübok Durgapur nung Odia tsür kaketshir ka tashiyim amshia raksatsüba tatalokba ya kanga tia maka aser aitsütsü tetemsü. Iba osang angashia ni kanga aoksar. Ni West Bengal Chief Minister Mamata Banerjee dang ozüing kübok ajak tansütsüsa aibelenertem nem temerenshi agüjang ta akhanger. West Bengal sorkar den tongtepratepa inyaksü asoshi ni ketdangsertem nem tetuyuba agütsüogo. Odisha state sorkar tenüng nung takoksa angur kibong nem akokba tashi teyari ajak agütsütsü," ta metetdaksü.

Delhi nung firecrackers meshi-meshia nokdangtsüji tamakoktsü: SC

New Delhi, October 12 (Agencies): Delhi nung green firecrackers amshitsü atema temelaba agüjang ta mepishiba ken o angadangba mapang Supreme Court-i, Delhi-NCR nung firecrackers meshimeshia nokdangtsüji tamakoktsü, ta metetdaksü.

Delhi nung Environment Minister, Manjinder Singh Sirsa-i, firecrackers tenokdangba ya agienra sorkari idangyongjisa onoki senden ka ayongzükba court tetuyubaji shidak benoka inyaksü atema jembitsü, ta metetdaksü.

court tetuyubaji shidak benshitsü atema sorkar renema dang lir, ta metetdaksü.

"Firecrackers nokdangbaji agienra onoki idangyongjisa senden ka ayongzükba court tetuyuba nungji ajemdaker nüngdakba telemtetbatem agia inyaksü," ta pai metetdaksü.

Delhi-NCR nung "green" firecrackers yanglutsü atema temelaba agüjang ta mepishiba ken o angadangba mapang nung Chief Justice B R Gavai aser Justice K Vinod Chandran nati akümba bench-i, firecrackers khenyongi meshimeshia nokdangtsüji tamakoktsü, ta ashi.

Ozüng agi memelaba firecrackers nokdangtsü atema enforcement teams renema lir aser awareness agütsütsü atema renema lir. Diwali densema benjung mongpu atonger, anungji green firecrackers dang amshitsü atema temelaba agütsütsüa akok.

Delhi sorkari green firecrackers-a nokdang, ajisüaka kari green firecrackers bo melatsü atema Supreme Court nem temepishiba agütsü, ajisüaka SC-i tang tashi nungbo obendang magütsür saka maneni ken o angadangtsü.

Delhi environment minister-isa, Supreme Court-i sorkar tetuyubaji agentsüra

Delhi sorkar ketdangser kati ashiba agi, ozüing agi memelaba firecrackers ayokba mesüra amshiba nokdangtsü atema Delhi Police, Delhi Pollution Control Committee aser Municipal Corporation of Delhi nungi enforcement teams tenteta lir, ta metetdaksü.

Iba dak alia iba tenokdangba junga benoktsü atema sensotem dang official channels mesüra Sameer App aser Green Delhi App ajanga ozüing alema inyakertem osang metetdakjang ta mepishitsü. Iba dak alia mopung menenba nokdangtsü atema awareness campaign agitsü.



TIR YIMYIM YIMOBILEM (EDITRIAL)

DIMAPUR MONDAY, OCTOBER (MONGPUTENI) 13, 2025

Gen Z aser Alpha asoshi tetsü oshi

Asenok Aortem asoshi tang ya asen tetsü oshi mesamadaktsüi renloka aotsü asoshi merangba mapang ka lir. Aji oda, iba mapa nung, talisa, Ao Sendeni tentetba Ao Riju nung ketdangsertemi kanga temulung agüja inyakba angur. Ibayongjiang, 2006 küm nungi tang tashi nung Arangtet tatidang 7 ben agiba tashi nung nisung 769-i tenren (course) balala nung takok anguba kuli agizükogo. Item rongnung taküm 2025 küm Arangtet tatidang nung teren balala asem nung takok angur parnok ajak agi 104 liasü. Iba jagi asenok nem Ao oshi mesamai renloka aotsü asoshi teimla tajung ka agütsür. Ajisüaka, tebilemtsü kaji, item Arangtet tatidang nung takok angurtem dak aketba temetetba aser tejangrabatemji asen nübortem nem tajangzük agütsütettsüsa kong amshitsü (?) ta asüba ya asütsü, kechiyong arangtet tatidang nung takok ngur ayuba kisüing jagi asen tetsü oshi renlokba nung meyaritettsü. Atangji, tang tashi nung Fazl Ali College nungbo Ao sayuba sentong lir aser memenui tanga college-tem nunga Ao sayu tenzütsü imlar, anungji school aser keketrejutem nung Ao sayutsü asoshi Arangtet tatidang nung takok ngur alirtemji maongka angutsü. Ajisüaka, Arangtet Tatidang nung takok ngua renema alir ajakbo kaketrejutem nung sayutsüsa mapa mengutettsü, anungji parnoki parnoksa, tatishitsü agi, Dimapur aser Kohima nung Ao sayuba sentong kar yanglua Ao sayutsü tenzük nungbo, ashiko, iba jagi parnoka mapa angutsü aser tanurtem nema Ao oshi angazüksüsa maongka tajung ka agütsür asütsü. Tanü, talisa, Mokochung district adena orr tangar pur bendangertem den meyoktepa aliba tesemtem nung Aor kibong aika nung Ao mejembii kümogo, anungji item tsüraburtemi parnok tanurtem dang Ao sayudaktsünüba mapang ka lir. Iba mapangji Arangtet Tatidang nung takok ngua renemer alirtem asoshi maongka tajung ka asütsü. Aji oda, tanü asüngbo electronics aser digital putu asünungji, tanurtemi kakete repranga azüngba ya masü saka computer aser smart phone screen nung dang repranga angazükner, anungji tanü Gen Z lanur aser Generation Alpha tanurtemi aginüba aser parnok putu yimya sobalibaji meteta tesayurtemi lesson sayutsüba sentongji renemtsüla. Atangji, itemji tang kaketreju nung tezüngdak kaketterem nungi agitetba dang masü saka ano peisasa purapiteta lesson sayutsüba sentongtemji tenük agi anguba dang masü saka tenarong agia angashitsüsa 'audio-visual' nung sayutsüsa renemtettsüla. Ibaji dang masü saka Arangtet tatidang nung takok angurtemi tanurtem dang Ao sayuba sentong (App) balala renemer 'social media' nung enoktsüra, ano iba jagiang ano Ao oshi tajungba aser tuluba renloka aotsü. Tanü asenok Aor chanutemi Ao jembitsü mesapuba ya parnoki mejembiner masü saka asenok taintemi parnok dang mesayu aser parnok tsüngdang pei tetsü oshi agi nümadangdanga jembia mesayuba ajanga mesapui akümba purtem lir. Aji oda, mapang kabo asen lima nung, talisa, private school-tem nung Ao jembira temerenshi agütsüba tashi ataloka liasü, kechiyong private school ajakji English dang jembitsü lapokba school amai kümadok. Ibaji asenoki matong aser mebilemdangi inyakba mapa ka liasü. Aji oda, iba nung jagi tenzüker kaketshirtem rongnung Ao jembirtembo mashi memetet aser tangar adoksaa mazüngba purtem ama züngshi. Atangji, tanübo nisung ajaki pei tetsü oshi jembinür aser angazükner, kechiyong iba jagi dang pei kin, pei kidong aser pei sobaliba ayak jangjar. Aji oda, tanübo English aser Hindi-bo school-i maoyong angazükner, anungji school nung dang masü saka kidanga aser tanga nunga tanurtemi asen tetsü oshi angazükettsüsa Arangtet Tatidang nung takok angurtemi shisadanga inyaktsüla. Ao Sendeni mesüra Ao Rijui tesem ajak nung Ao sayua moutettsü saka Ao Riju nung arangtetba purtem jagi tanü putu den apet tesem ajaklen Ao oshi renloktsüsa sentong yanglua inyaktsüla. Atangji, tanurtem asoshi Ao oshi angazüksüba tesem tajungtibajibo pei kiji asütsü saka pei tsüraburtemi Ao mejembitetra, koda angazüksü ? Ibaji tanü asenok watang lir.

OLEMSABANG

COUPLES' COUNSELLING

~ Rev. Dr. N. Moa Imsong, Counsellor

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdaktsütsü bilema adoktsür).

(Yashi adok nungi...)

Tejembitsü Asakba Apuani Den Koma Jembitsü?

1. Nai kechi shiner ibaji ashitsü oren aser onlongtem junga renemshiang aser koma ashi nung ajungtsü renemang.
2. Komala mapang ka nung ashi tajungba asütsü mita ata liang.
3. Ne jakla junga renemshir jembiang.
4. Apuani gesture aser reaction mita jembiang.
5. Ochi nung jembiang.
6. Akümtsüba jembiang.
7. Satok satoka jembiang.

Apuani Tesentaktep nung Mebenshitsütem

1. Nü apuani-i nai bilemba metetsü makok, anungji metetsü teyimla.
2. Anemsü jakla tebenshi.
3. Tilateri ajak nung asatena malitsüla.
4. Apuani tebilemba angatetsü memerangba jakla intokang.

Ne Teinyaktsütem

A. Ne mangdang ulushiang: A. Shin 29:18, Kong mangdang maka yangji nisungtem samar, saka shibai ozüng ayur pa tepelatsü.

1. Tsüngrem nung teimlaba ulushiang
2. Tsüngremi ne nem aika rezünga yuja kar ta amangang
3. Taoba tako tejashi nungi na pila liang

B. Nai ne dak junga reprangtsü renlokdakjang: Lipok 1:27, Tsüngremi na Pa mesükba nung yanglua lir.

1. Nai-a na ya shiba-a ta bilemer?
2. Ne taküm ya jenjang aketba taküm ka taa nai angatetsü merangang
3. Nai na asoshi bilemba ama na akümtsü merangang
4. Ne tekolok nung takar bilemtsü indang bilemtsü renlokdakjang
5. Na dang koma lir iba yagi nai na asoshi pela bilemang

C. Nai ne tekolok tashi metetsü merangang: Isaia 55:8, Tsüngremi ashi, ne tebilembaji kü tebilemba masü, ne sentongji kü sentong masü, ne lemangetemji kü lemanget masü.

1. Ne kolok nung kechi bilemtsüla iba indang dang bilemtsü nai shimtetang.
2. Ne tekolokji renemshia yangluang
3. Ne o nung tashi aliba nai metetang
4. Taküm melenshitsü o jembiang
5. Temoatsü o-tem jembiang

D. Taoba mapangji odakjang: 2 Korint 5:17, Nisung shiba Khrista nung lir, pa tasen poktetba, tejenba süiogo, ajak tasen kümogo.

1. Temulung yirua aliba ajak indokang
2. Taku tejashi ne molungjang nung tera teyangdaktsü
3. Taküm nung tamakoktem ajak koktetang

E. Shisabulu aser tetsükdaktsü arudang ajanga otettsü tashi ngutetang: 2 Korint 12:9, Tsüngremi ashir, Kü taochi na asoshi tepiri lir: tashi maitertem ni tashi ita yanglutsür.

1. Nai na nungi anogoshia shisatsü poktetdakjang
2. Tsüngremer mapang atasatetang
3. Taküm nung timtem ajuruba tetezü metetang
4. Taküm nung tetezü samadang Tsüngrem dak amangang.

F. Ne takümji agütsütsü asoshi liang: Luke 6:38, Agüjang aser ni ne nem shia, moshija aser anakshia agütsütsü.

1. Agütsüba nung na pelang
2. Tsüngremer taochi aser temeim danger den lemsateptsü nung nai pela benshiang
3. Ne temeim benshitsü asoshi ne molungsentsü teti lapoka yuang
4. Tajung proktsü aser indaktsütsü teti merangang

G. Pela alitsü shimtetang: 1 Peter 3:14, Tajung inyakba asoshi na timtemdaktsüra iba nung nai pela bilemang: iba asoshi nai tsüba teblem.

1. Pela alitsüba ya nai shimtetang
2. Teti ochi aser tenendak nung alitsü shimtetang
3. Tejangraba nung liang Rom 12:12, Teimla nung pelang; timtem nung taremsük liang; aser sarasadem nung teti akangang.

Apuani Yongtsü nung Shisabulutem Kar (issues)

1. Pai kü temang dang meimer ashi ni memeyimer? Asa mulung sadoka tongtepratepbang.
2. Kü kinungtsü ya sexy masüa.
3. Kü kinungboi ni koda jangratemtsütsü memetet.
4. Küna temeim samadokdagi.
- * Teti temeim aser taochi sayuteptsü tamadok, temeim dak asatanga meimtsü aser asatanga yaritsü jakla tarudaktsü.
- * Temeimi teti tatok agütsütsü molunga alir.
- * Temeimi tebilemtsü dang bilemtsür masü saka lenchii oagi meimer.
5. Kü kinungbo/kinungtsüi, ni taoba mapang nung tamajung inyakba tatok magütsüteter. Tatok agütsütepba melira ner kibong tarutsü jenjangji maka.

Iba oset azünger ajak Tsüngremi pei apuani den shisatsü ajema kümdakjangma. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nashville nung GMA Dove Awards sentong ayonga agiogo



GMA Dove Awards sentong nung Jelly Roll, Jon Batiste aser Brandon Lake nungeri ken ka atandang tangokba noksa nung angur.

October 12, 2025: 56buba Gospel Music Association (GMA) Dove Awards sentong October 7, 2025 aonung Nashville, Tennessee nung aliba Bridgestone Arena nung ayongzüka agiogo.

Brandon Lake-i award teimba (pongu) angu aser Song of the Year award ji "Hard Fought Hallelujah" ken ajanga angu.

"Hard Fought Hallelujah" ken ya Brandon Lake aser Jelly Roll nati atenba ken lir. Iba ken ajanga Jelly Roll-ia award asem angu.

Forrest Frank-i Artist of the Year award densema award asem nguogo. Iba award sentong ya October 10 nü TBN nung sayuogo aser maneni October 17 aonung 7:30 ako nung aser aonung 10:00 ako nunga sayutsü.

Tauren Wells-i ketdangsüa iba sentong agia liasü.

Tesüiba küm aika GMA Dove Awards sentong ya Lipscomb University indang Allen Arena nung agia aruogo, ajisüaka takümba iba sentong ya Nashville nung aliba Bridgestone Arena nung ayongzüka agi.

Award agütsüba sentong tenzüka For King & Country, Taylor Hill, Africa Nashville aser Stage Ready-i ken tasen "World on Fire" tena liasü.

Kasa sentong nung 'New artist of the Year' award angula, Leanna Crawford-i "Still Waters (Tenüngsang Ken 23)" ken aten.

Tauren Wells aser Gio natia "Let the Church Sing," ken aten, Josiah Queen-i "Dusty Bibles" aser "The Prodigal" ken na aten aser Elevation Worship & Elevation Rhythm-i "Goodbye Yesterday" aser "I Have Decided" ken aten.

Kasa sentong nung Fred Hammond-i The Choir Room den külemi ken ka aten.

GMA Dove Awards angurtemji yamai liasü- Artist of the Year award Forrest Frank-i angu, Rap/Hip-Hop Song Recording of the Year award ji Alex Jean-i angu, Rap/Hip-Hop Album of the Year award Hulvey-i angu aser Pop/Contemporary Album of the Year award Forrest Frank-i angu.

Pop/Contemporary Song of the Year award Forrest Frank-i angu, Recorded Music Packaging of the Year award TobyMac-i angu, Short-Form Music Video of the Year (Concept) award-a TobyMac-i angu, Song of the Year award Brandon Lake aser Jelly Roll nati angu, Short-Form Music Video of the Year (Performance) award-a Brandon Lake aser Jelly Roll nati angu aser Bluegrass/Country/Roots Recorded Song of the Year award-a tenatisa angu.

Life Surge sentong nung nisung 1,108-i Khrista nem bendanga agütsü

October 11, 2025: US tesem balala nung Life Surge sentongtem nung nisung jenti adenshia aikati Khrista nem taküm bendanga agütsüdar.

Nisung aikati anogo ka conference nung training agiba sülen marketplace ministry inyaker, iba denji külemi Life Surge-i ayongzükbä sentongtem nung meyrjang aikati Khrista agizüker; iba ya Tsüngremi mapa inyakba ajanga lir, ta sentong ayongzükertemi metetdaksü.

Taoba hopta tatembanglen-a Landover, Maryland nung ayongzükbä sentong nung nisung 5,030 aden aser 1,108-i Khrista sülen anidaksü atema telemtetba agiogo.

Life Surge Tir, Shawn Marcell-i video osang ka ajanga, "Iba ya conference dangbo masü. Anogo ka piyong tekülem sentong agi, shisa lemsatep aser aika taküm melenshiogo," ta metetdaksü.

Life Surge indang social media page nung aikati telangzüba tajung agütsüdar.

Beulah Martin ta ser nisung kati Instagram ajanga, "Nenok DC area-i aruba atema pelar! Tanü taküm aika melenshiogo! Sarasadem jenti langzüogo. @lifesurgeevent sentong nung o jembir ajak dang pelar. Tsüngremi Joe aser par company maneni moajang," ta lemsatep.

Marcell-i, "Taküm küm kija nung onoki ayongzükbä sentongtem nung nisung 15,000 dak temai Yisu nem pei taküm bendanga agütsüogo," ta metetdaksü.

Paisa, "Kibubai tenyaba wadang tulutiba ya Arogo nung pastor tem atema dang masü. Asenoki shishilembaba tesemtem nunga Kibubai tenyaba wadang inyaktettsü. Asenok aika asoshi Tsüngremi Pa temeim lemsateptsü atema tenyaba tesemji iba ya lir," ta ashi.

ANOGO ABEN TSÜNGREM DEN

Tanurtem Tsüngrem nungi sempettem

Chirnurji Kibuba nungi anguba senmang aser Pai saklokba temaitsü ta Laishibai ashir. Tsüngremi Adam aser Eva moatsü aser ashi, "Soyapokyang, jenti renang" (Lipok 1: 28).

Laishiba ajunga nung chirnurji Tsüngrem nungi anguba temoatsü ta züngshir. Tenüngsang Ken züluri parnok dang senmang aser tajangzük ta aja. Pai tanur kaji "tashi tait temeranger rarar ket nung lijakjang" den atishitepa zülü. "Lijakjang pongdang sünga aliba" den parnok medemdang (T. Ken 27: 4-5).

Aikati tanurtemji temoatsü ama masü timtem ka ama züngshir. Tanur abener aser raksa-a endoker, aser mereprangi toktsür. Kechiba maginütsü nung tanur abener aser asor ? Ya nü shi azü azüapongba mazüoktetba ajanga masü ama ? Kechi atalok ? Asenoki tanurji Kibuba nungi senmang ta amadoktsü asü ? Tsüngremji tanur agütsüsang ta dang masü, saka Par chir Mary ajanga tanur ka aküm ta asenoki mamadokli. Tetsü nu mendenji Tsüngremi nükjidong ka yur yanglu - soyapokya jenti arentsü asoshi. Ya mashilen mamshitsüla.

YouVersion Bible App downloads billion 1 alizüng tongogo



October 12, 2025: Alima nung kanga nüngtugu Bible app YouVersion downloads billion 1 alizüng atongba nüngtem nung taruba ita (November 2025) sentong ka ayongzüka agitsü.

Oklahoma nung aliba evangelical Arogo Life.Church nungi Bobby Gruenewald-i mezüng YourVersion tenzüka liasü.

Gari parts ayoktsü atema pai website ka tenzüka liasü aser 2006 küm October ita nung Chicago nung aliba O'Hare Airport nung pa tarensen nung nokdaka lia pai YouVersion Bible app tenzüksü atema apiteta liasü.

Nisung aika nem Laishiba züngdaksütsü atema technology amshitsü asoshi pai shisadangba mapang nung YouVersion.com ta ser website ka tenzüksü pai apitet. Iba sülen Hobby Lobby nungi Mart Green-i pa yarisema liasü.

Tesüa 2007 küm September ita nung pai YouVersion website tenzük, iba sülen ita asem tsüngda nisung 20,000-i online ajanga Lai zünga liasü. 2008 küm July 10 nü Apple App Store nung YouVersion app tenzük aser mezüngbuba hopta nungjisa YouVersion install asübaji 83,000 dak tema liasü.

2011 küm YouVersion-i United Bible Societies (UBS) nungi Digital Bible Library (DBL) den partnership yanglua liasü.

2013 küm July ita tashi nunbo YouVersion ya million 100 ben download sür liasü aser 2015 küm December ita tashi nunbo downloads million 200 ajung.

Iba app kanga sapua download asüba kulitemji alima nung smartphone amshirtem tali akümba aser iba app nung oshi aika bendenlokba agi lir.

2021 küm tashi nunbo YouVersion downloads million 500 ajung.

Tanübo YouVersion app ajanga oshi aika nung Lai züngteter. YouVersion nung aikati kanga sapua azüngbaji "Verse for the Day" lir.

YouVersion tongti office ji Edmond, Oklahoma, US nung amenoka lir; office nung toklang inyaker 200 dak tali lir aser volunteers 3,000 dak tali lir.

2025 küm YouVersion downloads billion 1 ajungba nüngtem nung November 17 nü Edmond, Oklahoma nung aliba Life.Church nung sentong ka ayongzüka amongtsü aser iba sentongji 'live' sayutsü. Iba nüngtem nungsa Amazon Prime-i küm shia November ita ya 'Bible Month' ta sangdongtsü.

AO OSHI ANGAZÜKDAK:**TANÜ ANGAZÜKTSÜBA OJANG****Tiyong****(adj)** tatembang anatsülen kasasa ajurutepdak, tezülen masü (centre, middle)

* Medemer ana tsüngda ni tiyong nung mejang.

Tizük**(v)** aremtet (bear, resist)

* Tsüraburi sensak tia ajak tizükteta tanurtem mesütet.



Tir Yimyim

OLONG PAITEP # 7298

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti
- Tsük rudenba
- Temzüng tesashi
- S ____ i
- Nisung rongnung telemsa
- Anogoshi
- Ajanga aor
- Tsük rizüngdak
- Tebang nungi adokba
- Süngdong tatembangtiba
- Meputep

-

(5)

-

(5)

-

(5)

-

(5)

-

(5)

-

(5)

-

(5)

-

(5)

-

(5)

-

(5)

LANGTSÜNGLEN

- Tenük telong
- Committee dang ajar
- Yagi ki okdoker
- Yim lenmang
- Temoatsü keter meyipa aruba
- Kanga junga menemba
- Kenyongi majinü
- Rong kanga tulu

-

(9)

-

(5)

-

(7)

-

(5)

-

(9)

-

(7)

-

(5)

-

(5)

-

(5)

OLONG PAITEP # 7297 TELANGZÜBA**TIPIEN :**

- Tanga, 6. Wara, 7. Rajang,
- Anük, 10. Jenjang, 11. Alar,
- Ngashi, 15. Nala, 16. Mechi.

LANGTSÜNGLEN :

- Anga, 3. Yabang, 4. Tarok,
- Orak, 8. Ainer, 9. Anema, 1
- Jabili, 11. Among, 12. Miim,
- Anem.

NAI-A YA METETTER

University of California faculty aser alumni-i taküm Nobel Prize pungu tashi ngutetogo. Iba agi America nung #1 public research university ajanga shilem agiba jangjatsür aser sorkari advancing world-changing scientific inquiry atema senotsü teyari agütsüba sayur.

UC San Diego aser UCLA alum Frederick J. Ramsdell den Seattle aser Japan nungi teyaritepertemi Nobel Prize in medicine angu.

Maneni, UC Berkeley emeritus professor John Clarke, UC Santa Barbara emeritus professor John Martinis aser UC Santa Barbara professor Michel Devoret Nobel prize for physics angu.

Tatamsa UC Berkeley professor Omar Yaghi-i Australia aser Japan nungi scientists den külemi chemistry prize lemsatapa liasü.

Manipur sorkari Shillong nung Rajbari ki osang jangjashitsür**Imphal, October 12, 2025**

(Agencies): Shillong nung aliba Rajbari building bentoker ta social media nung osang prokshiba atema Manipur sorkari jangjashitsüogo.

Rajbari building ya küm 80 tema tain lir aser 1949 matongdang yangluba lir. Kümtem süia arudang mapang shitak nung anepalu masüba agi ki kanga mejungi raksaa aor ta Executive Engineer-I, Planning & Development Authority-i

ashi.

Iba ki ya "dilapidated state" nung lir ta sangdongba ajanga sorkari ki yanglushitsü mapa tenzük ta Executive Engineer-isa ashi.

Department of Art & Culture, Government of Manipur-i mepishiba sülen "Infrastructure Development of Heritage Complex, Shillong" ta ser Detailed Project Report (DPR) yanglu aser iba ya North Eastern Council (NEC),

Government of India nem agütsü. NEC-i iba report jungjunga repringdangba sülen July 2023 nung agizüka liasü.

DPR nung Rajbari ki reconstruction aser restoration dena lir kechiyong ki tia kanga mejungi kümogo.

Mezüngbo iba ki section ka bendoktsü atema repringdang saka jungjunga repringdangdang ki ajunga chireptsü tia ajitet. Iba jagi kanga dang kümdanga manual dismantling asür ta Executive Engineer-i metetdaksü.

Iba ki nung keta aliba wooden doors, windows, aser wall panels ajak kanga junga yua lir aser akokba tashi tasenba nung amshitsü. Ki tasen yanglubaji original architectural design nung ajemdaker inyaktsü aser Rajbari building senmang mesamadaktsütsü ta paisa ashi.

Zubeen Garg indang viscera report GMCH tongogo**Guwahati, October 12, 2025**

(Agencies): Assam nung cultural icon Zubeen Garg indang viscera report Central Forensic Science Laboratory (CFSL), Delhi nungi aruogo aser ibaji Gauhati Medical College and Hospital (GMCH) nung expert examination atema agütsüogo.

GMCH nung expert committee ka ajanga asadanga repringtsü aser iba sülen comprehensive report ka renemer okadak aser Garg'er kibong nem agütsütsü ta SDGP Munna Prasad Gupta-i ashi.

"GMCH expert committee ajanga report agütsüba sülen onoki okadak agütsütsü. Asür Zubeen'er kibong nem-a report indang copy agütsütsü" ta Gupta-i ashi.

Special Investigation Team (SIT)-ia Garg asüdag Singapore nung bushisüngdang mesütetba indang tebilemtsü lemsatet.

Mutual Legal Assistance Treaty (MLAT) dena international law ajanga bendang lima nung independent investigations asütsü noktanger ta ADGP Gupta-isa metetdaksü.

Ministry of Home Affairs ajanga Singapore nung Attorney General's Office dangi Mutual Legal Assistance Request (MLAR) ka yokogo ta paisa ashi.

"Singapore nung ozüng memelaba bushisüngdang süra ibaji international protocols alema inyakba asütsü aser kulitem magizüktsü" ta Gupta-isa shisem.

Assam Association

Singapore nungi züngsem 11 Garg den rong nung liasü aser parnok dang asüngdangya asütsü jaokogo. Parnok rongnung nisung katibo telangzüba agütsüogo aser tanünga ajak Assam Police tonga arutsü shiogo. Parnok senzüsensongba aser Assam nung anenzüktsü atema maparen ajak renemogo ta Gupta-isa ashi.

Zubeen Garg asüba atema bushisüngdanga arudang pa indang personal security officers (PSOs) ana puogo aser kuli agütsür aika dang asüngdangya südar. Singapore nungi mapang shitak nung osang maruaka onoki tetsükdaksü kecha melii asüngdangya süa arudar ta ADGP Gupta-isa metetdaksü.

Manipur nungi cybercriminal ka Jharkhand police-i apu**Imphal, October 12, 2025**

(Agencies): Jharkhand kübok Gumla district nung bank account ka nungi Rs. 8.45 lakh auyazüka agiba ken o atema Jharkhand Police-i Manipur nung cybercriminal ka puogo.

Ambedkar Nagar, Gumla nung alir Amruudin Khan-i September 12 nü pa indang account nungi nisung kari Rs. 8.45 lakh ashikülaka agizükba atema Gumla police station nung ken o benok ta ketdangsürtemi

ashi.

Iba atema bushisüngdanga arudang bank account ana nungi Rs. 10.75 lakh tashi transfer asüba bushitet. Iba account ya Manipur kübok Imphal East district nung Lukram Dinesh Maitai meyong ta bushiteta liasü ta Gumla nung Sub-Divisional Police Officer (SDPO) Suresh Prasad Yadav-i ashi.

Iba dak sendakba nung tai tonglokja alisang dang asüngdangyatsü atema police

telok ka Manipur-i yok. Maitai-i parnok dang September 11 nü Rs. 8 lakh agizükba nangzük.

Imphal court nungi transit remand meshiba sülen October 11 nü tai tonglokja alisangji Gumla-i anir ogo aser pa tepuokdak yua lir.

Police-i Lukram Dinesh Maitai ket nungi ATM card asem, bank passbook tenet, mobile phone ana aser bank balala indang chequebooks aika ngutetogo.

Assam Congress-i 2026 nung Assam sorkar akümtsü**Guwahati, October 12, 2025**

(Agencies): Tawa Bodoland Territorial Council (BTC) nung takok mengutetaka 2026 küm Assam nung sorkar akümtsü ta Indian National Congress tanishirtemi metetdaksüogo.

Kokrajhar District Congress Office nung party senden ka amenba sülen Abbas Hafiz-i "elections

balalaji nukjidong balala atema lir" ta ashi. Pa ya Lower Assam Regional Congress atema Coordinator aser AICC atema Media Coordinator lir.


"Local body elections, state assembly elections aser Lok Sabha elections ya khenyongi balala" ta Abbas Hafiz-i ashi.

BJP-i mapa agütsütsü nangzükba meinyakba atema public-i Congress nungiter.

Linük nung lanur lakh aika maongka manguba atema jashiteper. Iba tejashi ajanga parnok Congress dangi arur ta paisa ashi.

BTC elections nung BJP-i takok mengutet aser parnoki state sorkar yimsü süaka tarutsü tia majungba iba ajanga sayur. Congress-i 2026 küm Assam nung sorkar akümtsü ta Hafiz-isa ashi.

Afghanistan-i tashiyim amshi shia telangzüba agütsütsü: PM Shehbaz Sharif



Islamabad, Mongputeni/Oct. 12 (Agencies): Afghanistan-i tang tesüsa Pakistan arütsülen rara mesüba Pakistan Ato Kilonser Shehbaz Sharif-i aitsüogo.

Pakistan armed forces ajanga telangzüba tajung agütsüba atema tenüngsang agütsüba mapang Pakistan Army temi linük arütsülen yimya shidak amshia temulungtetba tulu nung kumzüka ayuba atema ato kilonser akhum agüja liasü.

"Asen armed forces dak 'professional excellence' aliba atema tejak tenteter," ta PM Shehbaz Sharif-i ashi.

"Temulung tulu Field Marshal Syed Asim Munir lenisüba kübok Pakistan Army ajanga Afghanistan indang tashiyim mapa nung tapet telangzüba agütsüba kisüng masü saka parnok indang posts aika raksatsü aser iba yongji parnok meyiper ajen. Pakistan indang defence nung atsü-anem malitsü. Tashiyim amshia amakba ajak nung telangzüba

tajung aser tashi tait alitsü," ta pai ashi.

Pakistan indang defence ya tetemsü kabu nung lir, aser linüki litsü inch ajunga kumzüka ayutsü meteta lir, ta PM Sharif-i ashi.

Pakistan indang armed forces-i teti telangzüba tapet agüja arur aser linük ajunga security forces den lungjemer nokdaka lir ta ashi.

Arütsü alema kiralongra mapa inyakba indang jembidang, 'Fitna-tul-Khawarij' aser 'Fitna-tul-Hindustan' ama Afghan li amshia Pakistan amakba kiralongrar aliba indang Pakistan-i teti Afghanistan den osang lemsatapa arur, ta ato kilonseri ashi.

"Item kiralongrar telok ya Afghanistan telungzük nung alirtemi yarir."

Pakistan dak amaktsü atema kiralongrar telok temi par li amshiba Afghan sorkari nokdangtsü Pakistan-i imlar, ta pai ashi.

Afghanistan-i Deobarnü sangdong ka nung, Pakistan-i

par litsü-lika aser airspace nung tanen makai aibelenba mechi telangzüba agüja yasüng arütsülen operations agidang Pakistan sepai 58 tepsetogo ta ashi.

Hopta tetenzüklena Pakistan-i linük yimtiba Kabul aser linük anüdoklen shishilempaba tesem ka nung bomb pokloktsü, ta Afghan ketdangsür temi tai tonglokja liasü, koba Pakistan-ibo tenüng agia mali.

Taliban sorkar indang odongtar tekolak Zabihullah Mujahid-i ashiba agi, Afghan sepaitemi Pakistani army posts 25 rakzük, sepai 58 tepset aser ano 30 yirutsü.

"Afghanistan indang arütsü aser de facto lines ajunga nung tensa jungjunga azüoka lir, aser ozüng alema inyaksangshi timba nokdangogo," ta Mujahid-i Kabul nungi osangbener senden ka nung ashi. Sepaitem asüba indang Pakistan nungi sangdong agüja mali.

Taoba mapang Pakistan-i Afghanistan linük telung nung telungpur atsüka aliba tesemtem amak, saka item ya meta talak aser tenemlen liasü. Linük ana ya arütsülen mapang shia khateper. Saka Honibar aonung kanga sashia raraba ajanga linük ana tsüngta tensa tamajungba akumba sayur.

Taliban sorkar indang Defense Ministry ajanga Honibarnep sangdong ka nung, par sepaitemi arütsülen tayang kepzüka operations takok ngua agiogo, ta ashi.

Trump-i Pentagon dang sepai nem sen agütsütsü tuyur



Washington, Mongputeni/Oct. 12 (Agencies): US Tir Donald Trump-i Defense Department dang sorkar inyakyim aika shibanger liaka takaba sen ajak amshia US sepai nem Bodhbarnü tashinung taa agütsütsü totuyuba agütsüogo, ta Honibarnü ashi -ajisüaka federal mapa inyaker nisung meyrirjang aika mapai marudaktsüi aliba nung mokongshitsü.

"Tasü tait sepaitem October 15 tashinung taa angutsü aliba mesüyidaktsütsü mechi iba ya inyaker," ta Trump-i social media nung ashi.

Republican tiri iba totuyuba agütsüba ajanga tebilemtsü ka agiener, kechiaser sorkar indang kongsang balala shibanger anogo 11 buba nung lir aser ano

hopta tasem buba aser alema oa shibangtsü ama ajiteter. Ajisüaka federal employees atemabo iba mesük mapa inyaktsü majiteter, shirnok taa makai mapa inyaker aser ano nisung meyrirjang aika mapai marudaktsüi lir. White House budget office ajanga Hokulbarnü nungi tenzüka federal employees tem khen atema mapai marudaktsür.

Trump-i Democrats tenüng asen aser Defense Secretary Pete Hegseth dang October 15 nü sepiatem nem sen agütsütsü asoshi takaba sen ajak amshitsü totuyuba agütsütsü atema commander in chief ka ama tashi amshir ta ashi.

"Ibai inyaktsü atema sen jangjatetogo, aser Secretary Hegseth-i aji amshia asen sepaitem nem agütsütsü," ta Republican tiri ashi.

October 1 nü sorkar kongsang kar shibang tenzüka sülen US sepaitem ya Bodhbarnü sen mangutsü ta bilema liasü, koba federal budget cycle tenzüka anogo lir. US nung active-duty service members 1.3 million shi lir, aser Capitol Hill nung ozüng yanglurtemi sorkar shibangba

ajanga timtem ajurutsü indang jembidang sepaitem nem taa magütsütsü indang kanga jembia liasü.

Trump-ibo sen ya kolen nungi bener arutsüar masü, saka White House Office of Management and Budget indang odongtar kati Pentagon research and development funds amshitsü ta ashi.

Taoba fiscal year nungi 'research development testing and evaluation funds' indang mamshi aliba sen \$8 billion shi jangjateta lir aser October 15 alema sorkar nungi senotsü magütsüra mid-month paychecks atema ibaji amshitsü, ta Pentagon-i ashi.

Tir indang totuyuba nungya US Coast Guard adena-madenar mejangja, koba US Armed Forces indang kongsang ka lir saka yimjung alidangbo Department of Homeland Security ajanga repranger.

Affordable Care Act kübok health insurance atema federal subsidies densema bill kar nung Republican aser Democrats tsüngta tangatettep kati marutetba ajanga US sorkar indang kongsang balala shibangtsüsa akum.

Bangladesh nung typhoid vaccine agütsü tenzükogo

Dhaka, Mongputeni/October 12 (Agencies): Bangladesh nung tanurtem million aika typhoid tashidak nungi kumzüka toktsütsü atema vaccine agütsü tenzükogo.

Ita tepeyong agitsü aliba sentong ya Deobarnü tenzükogo, koba tanur ita teku nungi arishi küm 15 tsüngda alir million 50 shi nem typhoid conjugate vaccine (TCV) dose kaka agütsütsü nükjidong nung tenzükogo.

World Health Organization (WHO)-i agizüker aliba vaccine yagi küm pongu tashi kumzükba agütsür aser iba ya sorkar Expanded Programme on Immunisation (EPI) kübok angati lemsüdar.

South Asia nung drug-resistant typhoid strain tem prokshia aoba atema süoki ia bilemba mapang ka nung tang iba sentong ya tenzükogo. Pakistan nung iba strain yagi 2016 küm nungi timtem agüja arudar. Iba strain yagi antibiotics ka dak alaker ajak kokteter.

Bangladesh nung health worker temi school, clinic ajanga aser kishia sema oa vaccine agütsüdar aser talisa urban slum tem aser kinük nung aliba yimtsüngtem dak rangloker inyakdar. Iba sentong ya November 13 nü tashi benoka inyaktsü aser iba sülen

TCV ya linük indang regular immunisation schedule nung bendenloktsü.

Typhoid koba Salmonella Typhi bacteria agi adokdaksür, iba ya chiyongtsü aser tzü temenen ajanga prokshir. Iba tashidak yagi temang meta shirangdaksür, tepok nung tashiba ajangshir, mangmanga saktsünütsü atur aser junga anepalu mesüra nisung tasüa asür.

Bangladesh nung bushisüngdangertemi tawa ceftriaxone-resistant strains ngutetogo, koba shisabulutsüka, kechiyong ceftriaxone ya treatment tem rongnung tatembangbuba ka lir.

Mongintemi ashiba agi, tashidak ya jelia menokdangra resistant strains yagi typhoid ya anepalutsü atema kanga tasakba kümdaktsütsü.

Iba sentong tenzüksüba mapang sorkar health adviser, Nurjahan Begum-i ashiba agi, Bangladesh nung tang tashi tanurtem typhoid agi asüba ya taktsüka. Laisa, linüki diarrhoea aser night blindness koktetba ama iba tashidak ya-a koktettsü imlaba lemsatet.

Ketdangsürtemi ashiba agi, vaccine ya kidanger linük Pakistan, Nepal aser India nung kanga junga agütsüogo aser side effect balaka maliba ngutetogo.

Patrick Herminie-i Seychelles tir election kokogo



junga alitsü atema maongka agütsütsü," ta pai ashi.

Herminie-i takok anguba ajanga United Seychelles party nem sorkar azüoktsü atema tashi agütsüogo, kechiyong parnoki taoba ita general election mezüngbuba round nung parliament nung menden timba koker lir.

Iba takok ya Herminie asoshia temelenshi ka lir, shiba 2023 küm witchcraft atema pua liasü. Pa taoba mapang 2007 nungi 2016 tashi linük parliament indang speaker liasü. Ramkalawan shiba, electoral commission-i result sangdongba sentong nung dena liasü, pai Herminie nem tenüngsang agütsü, shiba trokbuba Seychelles tir kümogo.

Seychelles Nation newspaper nung adoktsüba noksa nung lenir ana ya result sangdongba sülen salemba sayuogo. Electoral commission headquarters kima Herminie pusemer meyrejang aika adenshi aser parnoki linük wako ayipshia Herminie pusema ayimtena liasü.

Hopta ana tejakdang tir election agiba nung takoker mebendangtetba ajanga run-off ka sülen telemtetba ka agia liasü. Voting ya Brehostibarnü tenzü, saka linük nung aliba nüburtemi Honibarnüang vote agütsü.

Seychelles kübok asetkong 115 lir aser iba linük ya Africa nung per capita dak sendakba nung takartiba linük lir.



Nagaland Archery Association-i ayongzüka October 10 nü DGP Archery Ground, Police Complex, Chumoukedima nung State Selection Trials agiogo. National level nung Nagaland tenü nungi asayatsü atema district balala nungi archer 39-i iba trail nung shilem agia liasü. Ajak senteper archer 23 (tebur 12 aser tetsür 11) 2025 Senior National Archery Championship atema shimogo, koba December ita tanabuba hopta Hyderabad nung asayatsü lir.

Smriti Mandhana-i otsü tasen ishika yanglu



Mongputeni/October 12, 2025 (Agencies): 2025 ICC Women's Cricket Cup nung Deobarnü Dr. Y.S. Rajasekhara Reddy ACA-VDCA Cricket Stadium, Visakhapatnam nung India team Australia den asayaba mapang Smriti Mandhana-i otsü tasen ishika yangluogo.

Asaya nung Alyssa Healy-i toss koka mezü ng bowling asütsü shimba sülen Smriti aser Pratika Rawal nati asaya kanga kümdanga asaya tenzük aser powerplay nung tena senteper half-century ka yanglua liasü.

Küm ka nung ODI asaya nung tetsür asayartem rongnung run timtiba yangluba asayar kümä otsü tasen yangluba sülen

la ya tetsür cricket asaya nung küm ka nung run 1000 dak tema yangluba mezü ngbuba asayar kümogo. 1973 küm mezü ngbuba tetsür ODI asayaba sülen asayar kati danga küm ka nung run 1000 adena yanglur maliasü.

Taoba mapang Australia tsür Belinda Clark-i 1997 küm run 973 yanglur liasü. Jangrademtsükaji Mandhana indang opening partner, Pratika Rawal-ia taküm run 800 dak tema yanglua la tanabuba jenjang nung lir.

Tebur ODI asaya nung asayartemi 149 ben küm ka nung run 1000 dak tema yangluogo. Teburtem rongnungi England nung asayar David

Gawar-i 1989 küm mezü ngbuba run 1000 yanglua liasü.

Maneni Mandhana-isa ano 50 over asaya nung asaya 112 nung dang run 5000 yanglua otsü tasen ka yangluogo.

La ya iba alizü ng tongtetba asayar pongububa aser India tsürtem rongnung Mithali Raj sülen tanabula lir. Indian vice-captain ya iba alizü ng takaratiba tongtetba asayar kümogo.

Lai West Indies tsür Stefaine Taylor-i otsü tasen yanglur aliba ajatetogo. La ya ano ball ishitiba (ball 6000) nung iba alizü ng atonga asayar kümogo.

Ano Mandhana ya iba alizü ng atongba tanutsüla kümogo. Lai arishi küm 29 ser anogo 86buba nung iba alizü ng tongteta liasü.

Asaya nung Mandhana-i half-century ka yanglu, koba iba asayamung nung lai mezü ngbuba half century yangluba liasü. Lai ball 66 nung run 80 yanglur out asü. Iba asaya masaya tsü ngda Mandhana-i taküm World Cup nung asaya asem nung run 54 dang yanglur liasü.

World Cup Qualifiers: Norway-i goal 5 agi Israel akok

Mongputeni/October 12, 2025 (Agencies): Erling Haaland-i Norway atema maneni kanga junga asaya-a Honibarnü Oslo nung Israel goal 5-0 agi akokba asaya nung hat-trick ka agüja otsüsütüsa asaya ishika nung dang international goal 50 idaktsüogo. Iba asaya akokba sülen Norway team 1998 küm sülen tang mezü ngbuba World Cup atema qualify asütsü ana nung lir.

Gaza nung Israel inyaksangshi anema Palestine nung pusemertemi longkak aiba mapang iba asaya asayaogo. Norway police-i telok senshidaktsütsü atema tear gas amshi aser nisung aika pua liasü. Ullevaal Stadium telung nung Israel nung pusemer parnok ishikati Israel wako ayipshia team pusem aser "Let the Ball Talk!" ta zülur banner ka bener liasü.

Group I nung Norway team-

i point 18 ngua parnok temaba jenjang nung lir aser parnok tanabuba jenjang nung aliba Italy team dang nungi point trok agi timba lir. Italy-ia Tallinn nung goal 3-1 agi Estonia kokogo. United States, Canada, aser Mexico nung 2026 World Cup atema qualify asütsü merangba mapang iba asaya akokba ajanga Norway jenjang kanga junga kümdaktsüogo. Kasa mapang nung Israel team Mongolbarnü Udine nung Italy den asayatsü aser parnok qualify asütsü imlar rongnung adentsü asoshi iba asaya akoktsü nü ngdaker.

Haaland ya tebur international football asaya nung goal 50 takaratiba idaktsüba asayar kümogo. Pai asaya 46 nung goal 51 idaktsü. Asaya nung pai metsüba penalty Israel goalkeeper Daniel Peretz-i nokdang, saka minute 18buba nung Anan Khalaili-i own goal

ka idaktsüba sülen Norway tejakdang aküm.

Iba sülen mapang tatsüka dang lir Haaland-i mezü ngbuba goal idaktsü aser Israel nung asayar Idan Nachmias ano own goal ka idaktsü. Iba sülen pai hat-trick ya idaktsü, koba pa indang international career nung hat-trick trokbuba liasü.

Tanga asaya ka nung Portugal-i goal 1-0 agi Republic of Ireland kokogo. Asaya nung Cristiano Ronaldo-i metsüba penalty goal keeper-i nokdang saka mapang apuloktsür asayaba mapang Ruben Neves-i goal ka idakja parnoki asaya akok.

Maneni Spain-ia maneni kanga junga asaya-a Georgia goal 2-0 agi kokogo aser Turkey-i goal 6-1 agi Bulgaria kokogo. Albania-ia goal 1-0 agi Serbia kokogo aser World Cup atema qualify asütsü asoshi timla mesamai lir.

BWF World Junior C'ship atema India nung asayartem renemer

Mongputeni/October 12, 2025 (Agencies): Mixed team asayamung nung otsüsütüsa bronze medal anguba sülen India nung asayartem BWF World Junior Championships nunga kija asaya nung junga asayatsü ternemba lir. Iba asayamung ya Hombarnü tenzüktsü.

India team-i iba asayamung nung tajungtibaji küm 17 tejakdang Pune nung asayaba mapang asayaogo. Iba asayamung nung Saina Nehwal-i tetsür kija asaya nung gold medal aser RMV Guru Sai Dutt-i tebur kija asaya nung bronze medal ngua liasü.

Tanü tashi nung India nung asayartemi iba asayamung nung medal 11 ngua lir kong silver pezü densema lir.

Taküm iba asayamung nung tetsür kija asayar junior world number one Tanvi Sharma aser China Open quarterfinalist Unnati Hooda nati medal angutsü imlar.

Tenaprongla ya telok balala nung ata lir asü ngung final nung ajuruteptsü akok.

Asian U-19 bronze medallist, Tanvi mezü ngbuba round atema bye nguogo aser la Indonesia tsür seventh seed Thalita Wiryawan den quarterfinal asayatsü akok.

Unnati-a tanabuba round nung Hong Kong tsür Liu Hoi Kiu Anna den asaya-a tenzüktsü aser kokyonga tura quarter nung Thailand tsür second seed

Anyapat Phichitpreechasak den asayatsü akok.

India nung asayartem rongnungi Asian U-19 asayamung nung bronze medal angurtem rongnung Vennala K aser 41 Rakshita Sree nata densema lir aser tena kasa telok nung ata lir. Semifinal tonga asayatsü atema tena asoshi temela masütsü. Rakshita, fourth seed Sri Lanka tsür Ranithma Liyanage den pre-quarters nung asayatsü akok aser Vennala kasa round nung China tsür Liu Si Ya den asayatsü.

Tebur kija asaya nung Lalthazuala Hmar round of 32 nung Indonesia nung world junior number one aser top seed Mohammad Zaki Ubaidillah den ajuruteptsü akok.

Eleventh seed Rounak Chouhan-a kasa round nung China nung asayar Li Zhi Hang den asayatsü koba akoktsü melarabo masütsü.

Gnana Dattu TT aser 15th seed Suryaksh Rawat na tasembuba round nung ajuruteptsü lir.

Tarep asaya nung taoba junior world number one boys' doubles team nung asayar Bhargav Ram Arigela aser Viswa Tej Gobburu na mezü ngbuba Slovenia nung Andrej Macek aser Andrej Suchy na den asayatsü. Bhavya Chhabra aser Sumith A R nata Philip Kryger Boe aser Salomon Thomase na den round of 64 nung asayatsü.

Vacherot-i otsü tasen ka yanglua Shanghai Masters kokogo



küma otsü tasen ka yangluogo.

ATP Masters 1000 final puti otsü nung tang agi tasembenbubang unseeded asayar ana final asayaogo.

Rinderknech shiba jenjang 54buba nung lir, pai asaya kanga tashi ita tenzük aser mezü ngbuba set tenzük mapang tatsüka tsü ngda Vacherot indang serve break asü aser mezü ngbuba set pai akok.

Ajisüka Vacherot-i kanga meranga asaya aser tanabuba set ya amokbanger asaya-a pai iba set akok aser tena kasasa aküm.

Tasembuba set nung Vacherot-i kanga kara serve ka break asü. Rinderknech shiba teberem nung timtem adoka treatment agia liasü, pai pa indang serve kümzüka meyteti Vacherot nem asaya kokdaktsü.

Vacherot-i iba asayamung nung kanga junga asayaogo aser pai semifinal nunga tamamangtsüka Novak Djokovic 6-3, 6-4 agi koka liasü.

Mongputeni/October 12, 2025 (Agencies): World number 204 Valentin Vacherot-i otsü tasen kanyanglua Shanghai Masters final nung pa indang cousin Arthur Rinderknech 4-6, 6-3, 6-3 agi koka mezü ngbuba Masters 1000 title ka benogo.

Pa ya Masters 1000 asayamung ka akokba asayartem rongnung rank tajemtiba nung aliba asayar

BILEMDANGANG

"Asenoki tang kechi inyaker iba dak tarutsü sendaka lir."